

BAB 1

Dasar, Inisiatif dan Program Pembangunan PKS



Bab 1

Dasar, Inisiatif dan Program Pembangunan PKS



Peranan penting perusahaan kecil dan sederhana (PKS) dalam pertumbuhan ekonomi Malaysia tidak dapat dipertikaikan memandangkan PKS merangkumi 98.5% daripada pertumbuhan perniagaan dan menyumbang sebanyak 38.9% kepada Keluaran Dalam Negeri Kasar (KDNK) pada tahun 2019. Secara keseluruhan, 907,065 pertumbuhan perniagaan didefinisikan sebagai PKS dan menyumbang sebanyak 48.4% kepada jumlah guna tenaga negara pada tahun 2019.

Tahun 2020 menyaksikan PKS berusaha sedaya upaya untuk menghadapi cabaran akibat pandemik COVID-19. Kerajaan Malaysia menangani ancaman coronavirus dengan memperkenalkan Pakej Rangsangan Ekonomi PRIHATIN dan Pelan Jana Semula Ekonomi Negara (PENJANA), yang memerlukan PKS menilai semula dan memikirkan semula cara perniagaan dijalankan, bersesuaian dengan 'normal baharu'.

MPUPK DAN INISIATIF UTAMA

Majlis Pembangunan PKS Kebangsaan (MPPK) ditubuhkan pada tahun 2004 untuk bertindak sebagai pihak berkuasa penggubal dasar tertinggi bagi memacu agenda pembangunan PKS kebangsaan merentas semua sektor ekonomi. Namun begitu, dengan peningkatan penekanan terhadap pembangunan usahawan juga, MPPK secara rasmi dijenamakan semula sebagai Majlis Pembangunan Usahawan dan PKS Kebangsaan (MPUPK) pada April 2019.

Sejak penubuhannya 16 tahun yang lalu, MPUPK telah mencapai kemajuan yang ketara dalam memacu agenda pembangunan PKS menerusi penerapan pendekatan yang komprehensif dan diselaraskan dalam melaksanakan inisiatif dan program yang

berpusat kepada PKS. Salah satu hasil yang paling ketara adalah peningkatan sumbangan PKS kepada KDNK, yang meningkat daripada RM206 bilion pada tahun 2004 kepada RM552.3 bilion pada tahun 2019. Antara pencapaian MPUPK adalah penerapan definisi standard untuk PKS, pembangunan pangkalan data PKS, pemantauan dan analisis prestasi PKS bagi memudahkan penggubalan dasar, memperkemas penyebaran maklumat mengenai PKS, pembangunan infrastruktur kewangan PKS, dan penggubalan Pelan Induk PKS (2012 - 2020).

Pelan Induk - yang dilancarkan pada bulan Julai 2012 - menyasarkan untuk memacu prestasi PKS ke tahap seterusnya menjelang tahun 2020 dengan meningkatkan sumbangan PKS sebanyak 41.0% kepada KDNK; 23.0% kepada jumlah dagangan eksport Malaysia; dan 65.0% kepada jumlah guna tenaga. Sasaran makro kebangsaan jangka panjang di bawah Dasar Keusahawanan Nasional 2030 (DKN 2030) menyasarkan untuk meningkatkan sumbangan PKS kepada KDNK sebanyak 50.0%, mewujudkan pekerjaan sebanyak 80.0% dan sumbangan kepada nilai eksport sebanyak 30.0% pada tahun 2030.

HASIL DAN SOROTAN PELAN INDUK PKS (2012 - 2020)

Pelan Induk PKS merupakan komponen utama bagi agenda Malaysia mencapai status negara berpendapatan tinggi menjelang 2020. Pelan Induk menetapkan haluan bagi pembangunan PKS dan mencipta rangka kerja pembangunan PKS yang merangkumi empat matlamat strategik, enam bidang tumpuan dan 32 inisiatif di bawah Pelan Tindakan, termasuk enam Program Berimpak Tinggi (*High Impact Programme*, HIP) serta sokongan institusi untuk memacu rancangan ini. SME Corp. Malaysia, sebagai agensi penyelarasan pusat yang bertindak untuk menyelaraskan dan memacu Pelan Induk PKS menumpukan kepentingan kejayaan bagi pelaksanaan enam Program Berimpak Tinggi.

HIP 1 Integrasi Pendaftaran dan Pelesenan Perniagaan

HIP 1 merupakan projek antara agensi yang diterajui oleh Unit Pemodenan Tadbiran dan Perancangan Pengurusan Malaysia (MAMPU) dengan kerjasama SME Corp. Malaysia, Suruhanjaya Syarikat Malaysia (SSM), Unit Penyelarasan Pelaksanaan (ICU), Perbadanan Produktiviti Malaysia (MPC) dan Kerajaan Negeri. HIP 1 menggalakkan pembentukan perniagaan baharu serta meningkatkan pemformalan perniagaan dengan menyediakan satu gerbang maklumat untuk pendaftaran dan pelesenan perniagaan. Program ini mempunyai tiga penyampaian; pembangunan gerbang pendaftaran dan pelesenan perniagaan; integrasi sistem pendaftaran dan pelesenan perniagaan; serta pelaksanaan program di Sabah dan Sarawak.

Penyampaian I yang memberi penekanan kepada pembangunan satu gerbang untuk pendaftaran dan pelesenan perniagaan telah dicapai menerusi pembentukan portal MalaysiaBiz (<https://malysiabiz.gov.my/ms>) yang dibangunkan dengan jayanya di bawah HIP 1. Maklumat yang terdapat di portal adalah mengenai 2,919 lesen - merangkumi 1,174 aktiviti perniagaan berdasarkan Piawaian Klasifikasi Industri Malaysia (*Malaysian Standard Industrial Classification*, MSIC) 2008 - daripada 508 pihak berkuasa pelesenan

persekutuan, negeri dan tempatan. Sebanyak 1,163 Rakan Informasi Lesen juga telah dilantik untuk memastikan bahawa maklumat di portal ini adalah terkini dan sah. Setakat bulan Disember 2020, sistem ini telah 100% berintegrasikan, dengan sejumlah 17 agensi diintegrasikan dalam portal ini.

Jangka masa untuk Penyampaian II – Integrasi Sistem Pendaftaran dan Pelesenan Perniagaan (2017 - 2020) merangkumi dua fasa, dengan Fasa I dilaksanakan pada 2018 - 2019 dan Fasa II pada 2019 - 2020. Penyampaian III yang memerlukan pelaksanaan HIP 1 di Sabah dan Sarawak telah selesai dengan pelancaran Portal MalaysiaBiz di Sabah pada bulan Julai 2017 dan di Sarawak pada bulan Ogos 2017. Portal MalaysiaBiz dilancarkan secara rasmi oleh Perdana Menteri, YAB Tan Sri Dato' Haji Muhyiddin bin Haji Mohd Yassin pada 7 Disember 2020.

HIP 2 Platform Pengkomersialan Teknologi (TCP)

Platform Pengkomersialan Teknologi (*Technology Commercialisation Platform*, TCP) di bawah HIP 2 direka untuk mencari dan menyokong inovasi dengan memudahkan proses pengkomersialan dengan lancar daripada pembentukan idea sehingga ke penggunaan produk atau perkhidmatan. TCP, yang dibangunkan oleh PlaTCOM Ventures Sdn Bhd, iaitu anak syarikat milik penuh Agensi Inovasi Malaysia (AIM) telah dilancarkan pada Mei 2014.

Bantuan kewangan dalam bentuk geran sehingga maksimum RM1.2 juta – dengan had untuk setiap komponen sehingga RM600,000 – disediakan kepada semua peserta HIP 2 berdasarkan pembayaran balik sehingga 20% pendahuluan. Komponen pemudahan terdiri daripada pembuktian konsep dan pembangunan prototaip, sokongan pelesenan, perundingan dalam bentuk bantuan teknikal, pengujian dan pengesahan, sokongan pengawalseliaan dalam memperoleh pensijilan, penyediaan penyelidikan pasaran bagi sektor yang spesifik, penghasilan produk, dan perkhidmatan inkubasi. Tempoh penyiapan program ini adalah selama 18 bulan.

Setakat ini, 200 projek telah diluluskan untuk mendapatkan bantuan bersepadu daripada pembuktian konsep sehingga ke tahap pengkomersialan, 220 perjanjian pelesenan telah ditandatangani, dan 85 inovasi telah dikomersialkan, serta penjualan sejumlah RM121 juta dihasilkan setakat bulan Disember 2020.

HIP 3 Rakan Kongsi Pelaburan PKS (SIP)

Program Rakan Kongsi Pelaburan PKS (*SME Investment Partner*, SIP) direka untuk meningkatkan akses PKS kepada pembiayaan menerusi penyediaan pembiayaan hibrid dengan toleransi yang lebih tinggi terhadap risiko yang berkaitan dengan perniagaan di

peringkat permulaan. Program ini unik berikutan inisiatif pembiayaan bersama antara sektor awam-swasta yang memenuhi PKS di peringkat permulaan (PKS yang beroperasi di antara tiga hingga lima tahun); menyediakan pembiayaan yang fleksibel dalam bentuk ekuiti, hutang atau hibrid hutang dan ekuiti; serta merangkumi PKS dalam semua sektor termasuk perniagaan tradisional borong dan runcit.

Enam Rakan Kongsi Pelaburan PKS telah dilantik di bawah program SIP dengan mandat untuk mengumpul dana daripada sektor swasta bagi melabur bersama-sama dengan dana Kerajaan yang telah diperuntukkan. Rakan Kongsi Pelaburan menghadapi pelbagai cabaran semasa mengumpulkan dana dalam keadaan pasaran yang tidak menentu. Walaupun terdapat rekod prestasi yang terpuji, setakat 31 Disember 2020, hanya satu pelaburan yang berjaya mengumpulkan pendanaan sektor swasta sebanyak RM8.5 juta untuk dipadankan dengan RM17 juta dana Kerajaan.

Sepuluh rakan kongsi penyampai telah dilantik untuk menjalankan Fasa 1 dengan 40 jam latihan dan Fasa 2 dengan 12 jam bimbingan dan pementoran. Sehingga 19 Oktober 2020, 343 PKS telah mendaftar untuk mengambil bahagian. Projek ini dijadualkan selesai pada 31 Disember 2020.

Program Akses kepada Pembangunan Kapasiti Pembiayaan (*Access to Financing Capacity Building, AFCB*) di bawah HIP 3 menyasarkan untuk membantu PKS dalam meningkatkan tahap kesediaan pembiayaan bagi membolehkan mereka mendapatkan prospek pembiayaan atau pelaburan setelah program ini selesai.

HIP 4 Program SMEs Go Global

Program *SMEs Go Global* direka untuk memberi dorongan pengantarabangsaan kepada PKS domestik, terutamanya yang berada dalam industri pertumbuhan tinggi. Program ini – yang dahulunya dikenali sebagai program *Going Export (GoEx)* dan diterajui oleh Perbadanan Pembangunan Perdagangan Luar Malaysia (MATRADE) – telah dijenamakan semula pada Januari 2020 dan kini diterajui oleh SME Corp. Malaysia.

Peserta HIP 4 terdiri daripada syarikat pengeksport sedia ada dan PKS yang bersedia untuk mengeksport dan dianggap berpotensi bagi pengantarabangsaan. Peserta program mendapat bantuan kewangan dalam bentuk geran untuk menyokong aktiviti pengantarabangsaan mereka.

Setakat Disember 2020, sebanyak 321 PKS telah diterima untuk menyertai HIP 4, dengan 179 PKS telah mengikuti program serapan pasaran. Sejumlah RM770.9 juta potensi jualan eksport telah dihasilkan sepanjang program ini.

HIP 5 Program Pemangkin

Program Pemangkin, satu komponen daripada Pelan Induk PKS (2012 - 2020) menasaskan untuk membangunkan PKS pertumbuhan tinggi dalam sektor strategik seperti peranti perubatan, bioteknologi, aeroangkasa, rel serta minyak dan gas, seiring dengan Dasar Keusahawanan Nasional (DKN 2030). Dua matlamat strategik HIP 5 adalah untuk meningkatkan jumlah PKS pertumbuhan tinggi dan PKS berinovatif dalam mewujudkan peluang pekerjaan berpendapatan tinggi, dan juga untuk meningkatkan produktiviti PKS.

Sejak penubuhan HIP 5 di bawah Rancangan Malaysia Ke-11, 134 PKS telah memperolehi manfaat daripada program ini, dengan majoriti syarikat yang menyertai telah menunjukkan pertumbuhan dari segi nilai jualan serta pengembangan pasaran global. Pencapaian ini digambarkan oleh kenyataan yang menunjukkan bahawa tujuh daripada sepuluh PKS yang telah menyertai Inisiatif BioNext – sebahagian daripada program HIP 5 – telah mencatatkan purata pertumbuhan jualan lebih daripada 20% dari tahun 2016 sehingga 2018. Daripada 30 PKS yang menyertai Inisiatif Pembuatan Aeroangkasa di bawah program ini, 27 PKS telah memperolehi pensijilan AS9100 yang membolehkan mereka menjadi sebahagian daripada rantaian bekalan global untuk pembuatan komponen aeroangkasa. Ini telah menghasilkan peningkatan dalam pendapatan jualan sebanyak 49%, daripada RM18.1 juta pada tahun 2017 kepada RM26.9 juta pada tahun 2019.

HIP 6 Inovasi Inklusif

Inovasi inklusif telah didefinisikan sebagai 'sebarang inovasi yang membawa kepada akses barangan dan perkhidmatan berkualiti yang berpatutan dalam mewujudkan peluang mata pencarian untuk penduduk yang dikecualikan, terutamanya mereka yang berada di dasar piramid, dengan dasar kelestarian jangka panjang disertai capaian yang signifikan'.

HIP 6 mempromosikan kerjasama awam-swasta dalam memacu perubahan untuk manfaat kumpulan 40% terendah daripada piramid pendapatan (B40). Program ini disesuaikan untuk memperkasa kumpulan B40 dengan memanfaatkan inovasi sebagai pumudahcara bagi mentransformasi komuniti – termasuk perusahaan mikro di luar bandar – menerusi pegangan serta sokongan teknikal dan pengurusan bagi inovasi berdaya maju yang dikenal pasti. Pengenalpastian inovasi yang berdaya maju adalah berdasarkan lima ciri utama; berpatutan, mampan, berskala, berkualiti tinggi dan boleh digunakan dengan pantas.

Program ini dimulakan oleh SME Corp. Malaysia dan diterajui oleh Yayasan Inovasi Malaysia (YIM), sebuah agensi di bawah Kementerian Sains, Teknologi dan Inovasi (MOSTI). Sehingga Disember 2020, sejumlah 2,376 inovasi telah diterima, dengan

756 telah disenarai pendek dan akhirnya sebanyak 114 diterima dalam program ini. Sehingga kini, 60 inovasi telah sedia untuk digunakan bagi memanfaatkan 37,451 individu dalam 51 komuniti. Sejumlah RM17.3 juta telah disalurkan sejak tahun 2015. Menggunakan dana sedia ada, insentif khas juga telah diperkenalkan untuk inovasi dengan ciri nilai ditambah yang dapat dimanfaatkan dalam memerangi virus COVID-19.

Pertandingan inovasi juga akan diadakan dengan kerjasama Kerajaan negeri Terengganu untuk menemukan inovasi baharu yang dapat membantu komuniti kecil penarik beca yang terkesan akibat pandemik COVID-19.

PEMBANGUNAN PKS DALAM BELANJAWAN 2021

Kerajaan telah membentangkan Belanjawan 2021 pada 6 November 2020. Belanjawan dengan peruntukan sebanyak RM322.5 bilion (tidak termasuk RM2 bilion untuk kontingensi) adalah kira-kira 2.5% lebih tinggi daripada Belanjawan 2020 (RM314.7 bilion), yang terbesar dalam sejarah negara. Sejumlah RM236.5 bilion diperuntukkan untuk perbelanjaan mengurus, RM69 bilion untuk perbelanjaan pembangunan dan RM17 bilion untuk Dana COVID.

Belanjawan 2021 bertujuan untuk memacu tiga matlamat utama – memastikan kesejahteraan rakyat, kelangsungan perniagaan dan ketahanan ekonomi. Ketiga-tiga matlamat ini adalah lanjutan daripada pakej rangsangan PRIHATIN, PRIHATIN PKS+, PENJANA dan Kita Prihatin yang telah diperkenalkan sebelum ini. Kesemua pakej rangsangan ini dirumus untuk membantu kumpulan rentan, memastikan kelangsungan perniagaan, mewujudkan pekerjaan yang berkualiti dan menyediakan persekitaran yang kondusif untuk pelaburan bagi membuka laluan ke arah pemulihan ekonomi pada tahun 2021.

Di bawah Belanjawan negara tahunan, RM38.7 bilion telah diperuntukkan untuk memberi manfaat kepada PKS secara eksklusif atau dapat diakses dengan perniagaan lain. Inisiatif utama merangkumi akses kepada pembiayaan; pembangunan PKS Bumiputera; pembangunan modal insan; meningkatkan digitalisasi, teknologi dan inovasi; pembangunan perusahaan mikro; akses pasaran; pembangunan usahawan wanita; dan langkah-langkah cukai lain.



Belanjawan 2021 bertujuan untuk memacu tiga matlamat utama – memastikan kesejahteraan rakyat, kelangsungan perniagaan dan ketahanan ekonomi.

Akses kepada Pembiayaan

Peruntukan sebanyak RM22.5 bilion diberikan untuk akses kepada program pembiayaan menerusi kemudahan berikut:

- RM10 bilion untuk kemudahan jaminan menerusi Syarikat Jaminan Pembiayaan Perniagaan (SJPP);
- RM3.7 bilion untuk Skim Pembangunan Maritim dan Logistik, Skim Pembiayaan Pembangunan Mampan, Skim Infrastruktur Pelancongan, dan Dana Pengangkutan Awam yang dilanjutkan sehingga 31 Disember 2023;
- RM3 bilion menerusi Skim Jaminan Prihatin Danajamin - yang dilanjutkan sehingga tahun 2021 dengan terma dan syarat yang ditambah baik - bagi syarikat korporat yang terlibat dalam industri berkemahiran tinggi seperti minyak dan gas;
- RM2 bilion untuk Skim Pembiayaan Teknologi Hijau 3.0 bagi menggalakkan terbitan sukuk SRI (*sustainable and responsible investment*) yang akan dijamin oleh Danajamin;
- RM2 bilion di bawah Bank Negara Malaysia (BNM) untuk Kemudahan Bantuan dan Pemulihan Bersasar bagi membantu PKS yang terkesan menerusi pinjaman daripada institusi perbankan;
- RM1.4 bilion menerusi Bank Pembangunan untuk Skim Pembangunan Nasional bagi menyokong pelaksanaan dan pembangunan rantai bekalan domestik serta meningkatkan pengeluaran produk tempatan seperti peralatan perubatan;
- RM300 juta menerusi EXIM Bank untuk Platform Pembayaran Rantai Bekalan Nasional (JanaNiaga) bagi membantu PKS yang berurusan dalam pembekalan kepada Kerajaan atau syarikat berkaitan Kerajaan (*Government-linked companies*, GLCs) yang menghadapi masalah aliran tunai;
- RM80 juta untuk pembiayaan alternatif, merangkumi RM30 juta sebagai geran padanan untuk pelaburan dalam platform pendanaan ekuiti ramai (*equity crowdfunding*, ECF) dan RM50 juta untuk pembiayaan antara rakan setara (*peer-to-peer*, P2P). Pengecualian cukai pendapatan sebanyak 50% daripada jumlah pelaburan - had jumlah RM50,000 - ditawarkan sebagai insentif kepada lebih ramai pelabur individu untuk mengambil bahagian dalam platform ECF; dan
- RM30 juta dalam bentuk geran padanan bagi menggalakkan industri minyak sawit untuk melabur dalam mekanisasi dan automasi bagi meningkatkan pertumbuhan dan daya saing.

Pembangunan PKS Bumiputera

Peruntukan sebanyak RM7.69 bilion disediakan untuk membiayai program pembangunan PKS Bumiputera seperti berikut:

- RM2.3 bilion untuk membantu kontraktor Kelas G1 hingga G4 bagi menjalankan projek kecil dan sederhana;
- RM2 bilion menerusi SJPP sebagai kemudahan jaminan untuk membiayai PKS Bumiputera;
- RM1.3 bilion untuk pelbagai program peningkatan kapasiti, termasuk pembangunan profesional dan Dana Kemakmuran Bumiputera serta program atau projek spesifik lain untuk Bumiputera;
- RM800 juta menerusi Bank Pembangunan Malaysia dan SME Bank untuk program peningkatan kapasiti;
- RM510 juta menerusi TEKUN dan Perbadanan Usahawan Nasional Berhad (PUNB) untuk membiayai PKS Bumiputera dan perusahaan mikro;

- RM300 juta menerusi SME Bank untuk kemudahan pembiayaan Skim Lestari Bumi;
- RM230 juta menerusi PUNB sebagai pembiayaan kepada PKS bagi perbelanjaan modal kerja, peningkatan sistem automasi dan peralatan serta perbelanjaan yang berkaitan dengan pelaksanaan pematuhan prosedur operasi standard (*standard operating procedure, SOP*) COVID-19; dan
- RM50 juta menerusi Majlis Amanah Rakyat (MARA) untuk Skim Pembiayaan Kontrak Ekspres.

Pembangunan Modal Insan

Peruntukan sebanyak RM3.87 bilion disediakan untuk pembangunan modal insan seperti berikut:

- RM2 bilion diperuntukkan di bawah Pertubuhan Keselamatan Sosial (PERKESO) untuk peningkatan PenjanaKerjaya seperti berikut:
 - Enam-bulan insentif sebanyak 40% daripada gaji bulanan untuk pekerja dengan gaji antara RM1,500 hingga RM4,000 sebulan
 - Insentif tambahan enam-bulan sebanyak 40% ditambah dengan 20% daripada gaji bulanan untuk pengambilan pekerja kelainan upaya, penganggur, ibu tunggal dan pekerja yang diberhentikan
 - Enam-bulan insentif khas sebanyak 60% daripada gaji bulanan, dengan 40% disalurkan terus kepada majikan dan 20% kepada pekerja tempatan yang menggantikan pekerja asing untuk sektor yang berkaitan
 - Kenaikan daripada RM4,000 kepada RM7,000 dalam kadar maksimum yang boleh dituntut oleh majikan untuk program kemahiran tinggi atau sijil profesional
- RM1.5 bilion untuk lanjutan selama tiga bulan Program Subsidi Upah, terutamanya untuk sektor pelancongan dan peruncitan, dengan kadar RM600 sebulan bagi pekerja yang berpendapatan RM4,000 sebulan. Had 200 pekerja bagi setiap permohonan telah dinaikkan kepada 500 pekerja;
- RM100 juta kepada Pembangunan Sumber Manusia Berhad (PSMB) untuk menjalankan latihan dengan kerjasama majikan daripada sektor swasta;
- RM100 juta di bawah Iskandar Regional Development Authority (IRDA) dan Sabah Economic Development and Investment Authority (SEDIA) untuk menyediakan latihan kemahiran baharu kepada pekerja yang terjejas akibat penutupan sempadan bagi pelancong asing;
- RM100 juta diperuntukkan kepada Perbadanan Ekonomi Digital Malaysia (Malaysia Digital Economy Corporation, MDEC) bagi memudahkan peralihan tenaga kerja sedia ada untuk memenuhi keperluan industri teknologi maklumat dan komunikasi (*information and communication technology, ICT*) yang semakin meningkat;
- RM50 juta untuk inisiatif penajaan pendapatan dan promosi pekerjaan bagi golongan rentan;
- RM20 juta untuk Pusat Inovasi dan Kreativiti Global Malaysia (Malaysian Global Innovation and Creativity Centre, MaGIC) untuk menjalankan program pembangunan perusahaan sosial;
- Menyediakan peluang pekerjaan kepada 500 individu dalam komuniti tempatan dan Orang Asli sebagai pemandu pelancong; dan
- Pengecualian levi PSMB selama enam bulan - bermula 1 Januari 2021 - untuk sektor pelancongan dan syarikat yang terjejas akibat COVID-19.

Peningkatan Digitalisasi, Teknologi dan Inovasi

Peruntukan sebanyak RM2.65 bilion disediakan untuk perkara berikut:

- RM1 bilion pakej insentif khas untuk teknologi nilai ditambah yang tinggi, terutamanya untuk menyokong pelaburan penyelidikan & pembangunan (*research & development*, R&D) bagi kluster aeroangkasa dan elektronik, terutamanya di Batu Kawan, Pulau Pinang dan Kulim, Kedah;
 - RM1 bilion menerusi Bank Pembangunan untuk Skim Transformasi Pendigitalan Industri bagi merancang aktiviti digitalisasi, dengan ketersediaan dana yang dilanjutkan sehingga 31 Disember 2023;
 - RM500 juta untuk Dana Teknologi Tinggi BNM bagi menyokong syarikat berteknologi tinggi dan inovatif;
 - RM150 juta untuk Skim Geran Pendigitalan PKS dan Geran Automasi bagi menyokong automasi dan pemodenan dalam kalangan PKS; dan
 - Pengenalan semula insentif cukai untuk aktiviti pengkomersialan produk R&D bukan berasaskan sumber bagi mewujudkan ekosistem R&D yang lebih kompetitif.
-

Pembangunan Perusahaan Mikro

Peruntukan sebanyak RM1.35 bilion disediakan untuk pembangunan perusahaan mikro menerusi program berikut:

- RM1.2 bilion menerusi TEKUN Nasional, PUNB, Agrobank dan institusi kewangan lain untuk menyediakan pembiayaan kredit mikro, termasuk RM110 juta untuk Kemudahan Perusahaan Mikro di bawah BNM bagi menggalakkan keusahawanan dalam kalangan pekerja gig dan yang bekerja sendiri, serta untuk menyokong program iTEKAD;
 - RM100 juta menerusi Bank Simpanan Nasional (BSN) untuk program Pembiayaan Perniagaan bagi komuniti Cina;
 - RM20 juta menerusi TEKUN Nasional untuk Skim Pembangunan Usahawan Masyarakat India;
 - RM20 juta untuk pinjaman mudah menerusi Skim Sukan TEKUN bagi membantu pengusaha industri sukan;
 - RM5 juta menerusi TEKUN Nasional untuk pembangunan keusahawanan dalam komuniti minoriti lain;
 - Moratorium pembayaran balik pinjaman sehingga RM150,000 untuk peminjam B40 dan perusahaan mikro, dengan peminjam diberi pilihan untuk penangguhan bayaran ansuran mereka bagi jangka masa tiga bulan atau mengurangkan pembayaran bulanan mereka sebanyak 50% bagi jangka masa enam bulan; dan
 - Geran Khas PRIHATIN sebanyak RM1,000 setiap satu akan diberikan kepada 20,000 orang peniaga dan penaja di Sabah.
-

Akses kepada Pasaran

Peruntukan berjumlah RM360 juta disediakan untuk program akses pasaran seperti berikut:

- RM150 juta untuk Kempen e-Dagang PKS dan PKS Mikro;
- RM150 juta untuk inisiatif *Shop Malaysia Online* menerusi platform e-dagang bagi menggalakkan perbelanjaan dalam talian yang memanfaatkan seramai 500,000 orang penjual tempatan, termasuk produk halal dan usahawan kraftangan;

- RM35 juta bagi misi perdagangan dan pelaburan untuk mempromosi barangan dan perkhidmatan keluaran Malaysia;
- RM25 juta untuk program Pembangunan Francais Mikro dan Francais Mampu Milik serta program Beli Barangan Buatan Malaysia;
- Pelaksanaan kemudahan *Authorised Economic Operator* (AEO) di peringkat nasional untuk memudahkan proses akreditasi AEO dan memperluaskan AEO kepada penyedia perkhidmatan logistik dan pengendali gudang yang diluluskan;
- Projek rintis untuk pendaftaran e-perolehan bagi perusahaan sosial yang memiliki Sijil Program e-Perolehan Impak Kerajaan daripada MaGIC dan agensi terpilih lain bagi membolehkan mereka menjadi pembekal kepada Kerajaan;
- Insentif cukai bagi penubuhan Pusat Dagangan Global pada kadar konsesi 10% untuk jangka masa lima tahun dan boleh diperbaharui bagi tempoh lima tahun lagi;
- Had nilai jualan bagi aktiviti nilai ditambah dan aktiviti tambahan yang dijalankan di zon perindustrian bebas dan gudang pembuatan berlesen dinaikkan daripada 10% kepada 40% daripada jumlah nilai jualan tahunan; dan
- Pengecualian cukai pendapatan untuk eksport perkhidmatan jagaan kesihatan swasta dilanjutkan sehingga tahun taksiran 2022.

Pembangunan Usahawan Wanita

Peruntukan sebanyak RM145 juta disediakan untuk pembangunan usahawan wanita menerusi inisiatif berikut:

- RM95 juta menerusi TEKUN, MARA dan Agrobank untuk pembiayaan kredit mikro khas bagi memperkasa usahawan wanita;
- RM50 juta menerusi Yayasan Pembangunan Ekonomi Islam bagi menyokong aktiviti pembiayaan Islam menerusi Ar-Rahnu BizNita; dan
- Latihan dalam pemasaran, pelabelan dan pembungkusan disertai dengan panduan teknikal mengenai perniagaan bagi 2,000 usahawan wanita menerusi Program Pembangunan Perniagaan Usahawan Mikro (BizMe).

Langkah-langkah Lain

Peruntukan bernilai RM155 juta disediakan untuk tujuan berikut:

- RM85 juta untuk sektor pelancongan, dengan RM50 juta untuk penyelenggaraan dan pembaikan kemudahan pelancongan di seluruh negara dan RM35 juta menerusi Majlis Pelancongan Kesihatan Malaysia bagi meningkatkan daya saing industri pelancongan kesihatan tempatan;
- RM70 juta untuk sektor pertanian, dengan RM60 juta menerusi Agrobank bagi Program Modenisasi Rantai Nilai Agromakanan dan RM10 juta untuk Program Pengembangan Akuakultur; dan
- Enakmen Langkah-langkah Sementara bagi Mengurangkan Kesan Penyakit Koronavirus 2019 (COVID-19) Akta 2020 (*COVID Act*) untuk membantu individu dan perniagaan dalam memenuhi kewajiban kontrak. Akta ini juga menubuhkan Pusat Mediasi COVID-19 dengan kadar perundingan bersubsidi untuk perniagaan mikro dan kecil.

Langkah-langkah Percukaian Lain

- Cukai pendapatan untuk individu yang berpendapatan di antara RM50,001 dan RM70,000 setahun akan diturunkan sebanyak 1% – daripada 14% kepada 13% – yang dijangka memanfaatkan 1.4 juta pembayar cukai termasuk milikan tunggal dan perniagaan perkongsian;
- Bagi menggalakkan majikan menyediakan peluang pekerjaan kepada bekas banduan dan bekas penagih dadah serta mengintegrasikan golongan ini ke dalam masyarakat, potongan cukai tambahan terhadap imbuhan yang diberikan kepada majikan yang menggajikan bekas banduan, orang diparol, orang yang diselia dan bekas penagih dadah dilanjutkan sehingga tahun taksiran 2025; dan
- Bagi memberi insentif kepada majikan untuk melibatkan warga emas, potongan cukai tambahan terhadap imbuhan yang diberikan kepada majikan yang menggajikan warga emas dilanjutkan sehingga tahun taksiran 2025.

DASAR AUTOMOTIF NASIONAL 2020

Kementerian Perdagangan Antarabangsa dan Industri (MITI) telah melancarkan Dasar Automotif Nasional 2020 (*National Automotive Policy*, NAP 2020) pada 21 Februari 2020. NAP 2020, yang merupakan pengukuhan dan kesinambungan daripada NAP 2014 menyasarkan untuk mendorong Malaysia menjadi peneraju serantau dalam pembuatan automotif.

NAP pertama yang diperkenalkan pada tahun 2006 di bawah Pelan Induk Perindustrian Ketiga (*Third Industrial Master Plan*, IMP3) 2006 – 2020 bertujuan mentransformasi industri automotif sebagai penyumbang utama kepada pembangunan ekonomi Malaysia. Edisi kedua dasar yang diperkenalkan pada tahun 2009 memfokuskan kepada peningkatan kemampuan industri automotif domestik, serta mewujudkan persekitaran yang kondusif untuk menarik pelaburan.



Objektif NAP 2020 adalah untuk:

- Membangunkan ekosistem teknologi bagi Kenderaan Generasi Seterusnya (*Next Generation Vehicles*, NxGV*) agar Malaysia menjadi hab serantau untuk pengeluaran kenderaan sebegitu;
- Memperluaskan penyertaan industri automotif domestik dalam sektor Mobiliti sebagai Perkhidmatan (*Mobility as a Service*, MaaS*) yang tidak hanya memfokuskan pada pembangunan teknologi tetapi juga pada keseluruhan ekosistem pengangkutan;
- Memastikan bahawa industri automotif domestik dilengkapi dengan lebih baik dengan paradigma industri baharu yang berkait rapat dengan Revolusi Perindustrian 4.0 (*Industrial Revolution 4.0*, IR4.0*);
- Memastikan bahawa keseluruhan ekosistem – pengguna, industri automotif domestik dan Kerajaan – memperoleh manfaat maksimum daripada kesan pelaksanaan NxGV; dan
- Mengurangkan pelepasan karbon daripada kenderaan dengan menambah baik tahap ekonomi bahan bakar di Malaysia menjelang tahun 2025.

Empat pelan pembaharuan dan tiga rangka tindakan telah dibentuk di bawah NAP 2020 sebagai panduan untuk mencapai objektifnya. Strategi terdiri daripada rangkuman rantai bekalan industri, modal insan, kesediaan infrastruktur, serta pembangunan kejuruteraan dan teknologi. Pelan pembaharuan dan rangka tindakan akan dikaji secara berkala bagi memastikan mengikuti trend dan perkembangan dalam teknologi disruptif.

NAP 2020 telah menetapkan tahun 2030 sebagai tahun dengan sasaran berikut dapat dicapai:

- Sumbangan sebanyak RM104 bilion kepada KDNK menerusi sektor pembuatan;
- Sumbangan sebanyak RM12.3 bilion kepada eksport dalam bentuk kenderaan binaan sepenuhnya (*completely built-up*, CBU); dan
- Penjanaaan pekerjaan sebanyak 323,000 kepada jumlah pekerjaan.

NAP 2020 memberi peluang kepada syarikat – termasuk PKS – yang berkaitan dengan industri automotif untuk menyertai rantai bekalan dan digalakkan untuk melibatkan diri dengan Kerajaan dalam menggubal dasar yang dapat dilaksanakan.

*Nota

- NxGV** diklasifikasikan sebagai kenderaan cekap tenaga (*energy-efficient vehicles*, EEV) yang dilengkapi dengan automasi kenderaan minimum Tahap 3. Teknologi NxGV diklasifikasikan mengikut lima tahap, daripada kenderaan menggunakan pemandu sehingga kenderaan sepenuhnya tanpa pemandu.

Tahap 3 adalah automasi bersyarat dengan kenderaan berautonomi tetapi hanya dalam keadaan teguh dan ideal, dengan pemandu manusia masih perlu berada di belakang tabir. Sekiranya syarat ini tidak dipenuhi, pemandu manusia mesti mengambil alih. Pihak Kerajaan menyasarkan untuk memperkenalkan NxGV ke dalam pasaran pada tahun 2025.

- MaaS** adalah konsep yang mengintegrasikan pelbagai jenis mod perkhidmatan dan pengangkutan – termasuk aplikasi berkongsi perjalanan, perkhidmatan penghantaran dan perkhidmatan penjagaan kesihatan dalam talian – menjadi satu perkhidmatan berpusat menerusi platform digital. Kerajaan, menerusi MaaS, berusaha untuk mempengaruhi model pemilikan baharu dan menjadikannya komponen utama dalam pengangkutan masa hadapan di negara ini.
- IR 4.0** merujuk kepada pembangunan dan penggunaan teknologi dalam bidang kecerdasan buatan, analisis data raya dan Internet of Things yang membolehkan pelaksanaan industri NxGV dan MaaS.

Artikel Khas

Program Pembangunan PKS pada Tahun 2019 dan 2020

SME Corp. Malaysia sebagai agensi penyelaras pusat (*central coordinating agency*, CCA) bagi program pembangunan PKS menyelaras, memperkemas, memantau dan menilai kemajuan dan keberkesanan program berkaitan menerusi Pelan Tindakan Bersepadu PKS (*SME Integrated Plan of Action*, SMEIPA).

PROGRAM PADA TAHUN 2019

Pada tahun 2019, Kerajaan terus melaksanakan pelbagai program pembangunan PKS menerusi 18 Kementerian, enam agensi tunggal dan 53 agensi. Program-program ini merangkumi enam bidang tumpuan utama; pembangunan modal insan, akses kepada pembiayaan, akses kepada pasaran, penerapan teknologi dan inovasi, infrastruktur, serta persekitaran perundangan dan pengawalseliaan. Sebanyak 175 program, dengan perbelanjaan kewangan berjumlah RM9.6 bilion telah dilaporkan untuk tahun 2019. Program ini telah memberi manfaat kepada 656,468 PKS.

Jadual 1: Ringkasan Program pada Tahun 2019

Bidang Tumpuan	Bilangan Program		Perbelanjaan Kewangan		Bilangan Benefisiari PKS	
	Jumlah	Bahagian (%)	RM (juta)	Bahagian (%)	Jumlah	Bahagian (%)
Pembangunan Modal Insan	54	30.9	193.1	2.0	139,624	21.3
Akses kepada Pembiayaan	38	21.7	9,122.2	95.1	444,640	67.7
Akses kepada Pasaran	37	21.1	127.3	1.3	63,816	9.7
Penerapan Teknologi dan Inovasi	29	16.6	100.7	1.1	7,245	1.1
Infrastruktur	16	9.1	42.4	0.4	1,143	0.2
Persekitaran Perundangan dan Pengawalseliaan	1	0.6	5.5	0.1	-	-
Jumlah	175	100.0	9,591.2	100.0	656,468	100.0

Pada tahun 2019, bidang tumpuan pembangunan modal insan mempunyai bilangan program terbanyak, mencakupi 30.9% daripada jumlah program yang dilaksanakan dengan perbelanjaan sebanyak RM193.1 juta bagi menjalankan program untuk 139,624 benefisiari

PKS. Akses kepada program pembiayaan untuk 444,640 benefisiari PKS mencakupi sebanyak 95.1% (RM9.1 bilion) daripada jumlah perbelanjaan bagi kesemua enam bidang tumpuan utama. Sebanyak 37 program akses kepada pasaran, dengan perbelanjaan sebanyak RM127.3 juta dilaksanakan untuk 63,816 benefisiari PKS sementara 29 program penerapan teknologi dan inovasi, dengan perbelanjaan sebanyak RM100.7 juta dilaksanakan untuk 7,245 benefisiari PKS. Terdapat 16 program infrastruktur – dengan perbelanjaan sebanyak RM42.4 juta – yang telah memberi manfaat kepada 1,143 benefisiari PKS sepanjang tahun 2019.

PROGRAM PADA TAHUN 2020

Pada tahun 2020, sebanyak 211 program dengan perbelanjaan kewangan berjumlah RM13 bilion telah dilaksanakan. Program-program ini, yang telah memberi manfaat kepada 656,097 PKS, telah dilaksanakan oleh 17 Kementerian, enam agensi tunggal dan 59 agensi lain.

Jadual 2: Ringkasan Program pada Tahun 2020

Bidang Tumpuan	Program		Perbelanjaan Kewangan		Bilangan Benefisiari PKS	
	Bilangan	Bahagian (%)	RM (juta)	Bahagian (%)	Bilangan	Bahagian (%)
Pembangunan Modal Insan	99	31.1	3,285.1	19.6	561,190	48.1
Akses kepada Pembiayaan	93	29.3	12,687.1	75.9	459,173	39.3
Akses kepada Pasaran	47	14.8	188.3	1.1	23,430	2.0
Penerapan Teknologi dan Inovasi	43	13.5	418.0	2.5	50,244	4.3
Infrastruktur	36	11.3	142.5	0.9	73,023	6.3

Akses kepada program pembiayaan terus membentuk sebahagian besar pembiayaan bagi program pada tahun 2020, dengan 75.9% atau RM12.7 bilion daripada jumlah perbelanjaan kewangan untuk tahun ini serta mencakupi sebanyak 29.3% atau 93 daripada jumlah program yang telah dilaksanakan. Program ini telah memberi manfaat kepada 459,173 PKS. Pembangunan modal insan mempunyai jumlah program terbanyak, mencakupi 99 program atau 31.1% daripada jumlah keseluruhan program dengan perbelanjaan sebanyak RM3.3 bilion. Program ini telah memberi manfaat kepada 561,190 PKS. Sebanyak 47 program akses kepada pasaran, dengan perbelanjaan sebanyak RM188.3 juta telah dilaksanakan dan memanfaatkan sebanyak 23,430 PKS. Sejumlah 43 program penerapan teknologi dan inovasi dengan perbelanjaan sebanyak RM418.0 juta dan 50,244 benefisiari PKS telah dilaksanakan manakala 36 program infrastruktur telah dilaksanakan untuk 73,023 benefisiari PKS dengan perbelanjaan sebanyak RM142.5 juta.

Perincian program boleh didapati di <https://www.smeinfo.com.my/>.

Artikel Khas Pelaksanaan Status PKS



Pendaftaran bagi status PKS dengan SME Corp. Malaysia yang dilancarkan pada 1 Mac 2020 bertujuan untuk mengesahkan status PKS bagi semua pertubuhan perniagaan yang memenuhi definisi PKS dan untuk memastikan bahawa syarikat yang berniat untuk mendapatkan bantuan dan insentif yang berkaitan dengan PKS daripada Kerajaan telah memenuhi definisi kebangsaan PKS seperti yang ditetapkan oleh Kerajaan menerusi Majlis Pembangunan Usahawan dan PKS Kebangsaan (MPUPK).

PKS boleh mendaftarkan Status PKS mereka secara dalam talian menerusi Sistem Pendaftaran Status PKS. Bayaran pendaftaran Status PKS sebanyak RM100 dikenakan untuk tempoh sah laku selama dua tahun. Namun begitu, berikutan cabaran yang dihadapi oleh PKS sepanjang tempoh pandemik COVID-19, pelepasan pendaftaran diberikan untuk tempoh sah laku selama satu tahun dari 1 Mac hingga 31 Disember 2020. Setelah diperakui sebagai PKS, syarikat boleh memuat turun perakuan digital sebagai bukti status.

Dokumen asas yang diperlukan untuk pengesahan Status PKS adalah:

- **Pendaftaran Perniagaan** – Borang Pendaftaran Perniagaan SSM terkini seperti *Super form* / Borang 9, 24 dan 49 dan M&A, Borang D, Profesion dan Pelesenan Perdagangan, Ordinan Perniagaan (hanya relevan untuk Sabah dan Sarawak), Akta Perkongsian Liabiliti Terhad 2012, Akta Pendaftaran Perniagaan 1956;
- **Jualan dan Hasil** – Salinan terkini akaun dan penyata kewangan yang diaudit untuk tahun 2018 atau 2019 (untuk Sdn Bhd sahaja) dan Akaun Pengurusan 2019, Penyata Untung dan Rugi (untuk perusahaan, perkongsian liabiliti terhad, profesional dan yang didaftarkan di bawah Ordinan);
- **Pekerja Sepenuh Masa** – Penyata caruman Kumpulan Wang Simpanan Pekerja (KWSP) terkini; dan
- **Ekuiti dan Pemegang Saham** – *Super form* / Borang 24 dan 49, pulangan tahunan, Pendaftaran Ahli (untuk Sdn Bhd sahaja), dan profil syarikat perkongsian liabiliti terhad, maklumat mengenai pemilik perniagaan dan lesen perniagaan terkini, pengesahan pendaftaran perniagaan daripada Lembaga Hasil Dalam Negeri (Kuching) dan cabutan nama perniagaan pendaftaran dari Pejabat Daerah.

Sehingga 31 Disember 2020, sebanyak 11,608 perniagaan telah disahkan sebagai PKS dan 353 sebagai bukan PKS.

APA**Pendaftaran Status PKS**

Mengesahkan Status PKS semua entiti perniagaan yang memenuhi definisi PKS

SIAPA**Entiti perniagaan merentas semua sektor ekonomi**

Syarikat yang ingin memohon bantuan dan insentif untuk PKS

APA YANG SAYA BOLEH DAPAT**Status PKS yang diperakui**

Perakuan digital boleh dimuat turun dengan bayaran sebanyak RM100

Tempoh Sah Laku: **Dua tahun**

BAGAIMANA**Permohonan dalam Talian**

Lawati **smereg.smecorp.gov.my**

Pendaftaran percuma: **1 Mac - 31 Disember 2020**

Tempoh Sah Laku: **Satu tahun**

Pendaftaran Status PKS boleh diakses di <https://smereg.smecorp.gov.my/reg/>.